

CINNÍ

CINNEADH CUR CHUN FEIDHME (AE) 2023/1628 ÓN gCOIMISIÚN

an 10 Lúnasa 2023

lena ndiúltaítear d'iarratas ar thásc geografach faoi chosaint i gcomhréir le hAirteagal 52(1) de Rialachán (AE) Uimh. 1151/2012 ó Pharlaimint na hEorpa agus ón gComhairle

(‘Лидский квас/Lidski kvas’ (TGFC))

(tugadh fógra faoi leis an doiciméad C(2023) 5371)

(Is é an téacs Béarla amháin atá barántúil)

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) Uimh. 1151/2012 ó Pharlaimint na hEorpa agus ón gComhairle an 21 Samhain 2012 maidir le scéimeanna cáilíochta do tháirgí talmhaíochta agus do bhia-earraí ⁽¹⁾, agus go háirithe Airteagal 52(1) de,

De bharr an mhéid seo a leanas:

- (1) I gcomhréir le hAirteagal 50 de Rialachán (AE) Uimh. 1151/2012, rinne an Coimisiún scrúdú ar an iarratas ar chlárú na n-ainmneacha ‘Лидский квас/Lidski kvas’ mar thásc geografach faoi chosaint’ (TGFC). Tagraítear san iarratas do dheoch choipthe a tháirgtear i gcathair Lida na Bealarúise agus chuir an Chuideachta faoi Theorainn Scaireanna ‘Lidskoe Pivo’ de chuid na Bealarúise isteach é an 21 Iúil 2021 (PGI-BY-02788).
- (2) Tar éis an ghrinnscrúdaithe, sheol an Coimisiún litir inar iarradh soiléiriú ar roinnt gnéithe den chomhad. Ós rud é go háirithe nach mór uisce a thagann ó fhuaráin ar leith atá lonnaithe ar thalamh ar leis an iarratasóir é a úsáid chun ‘Лидский квас/Лидски квас’ a tháirgeadh, agus go ndéantar an táirge a tháirgeadh de réir ‘treoir theicneolaíoch uathúil ar leith’, mar a luaitear sa tsonraíocht táirge (arb é an t-iarratasóir an t-úinéir agus an t-aon úsáideoir), iarradh ar an iarratasóir a mhíniú an féidir le tairgeoirí eile a bheith rannpháirteach i gcomhréir le prionsabail na scéime um thásca geografacha san Aontas.
- (3) Thairis sin, mhínigh an Coimisiún go bhféadfar caitheamh le duine nádúrtha nó duine dlítheanach aonair mar ghrúpa agus iarratas á chomhdú aige, i gcás ina léirítear gur comhlíonadh an dá choinníoll in Airteagal 49(1), an dara fómhír, de Rialachán (AE) Uimh. 1151/2012: (a) is é an duine lena mbaineann an t-aon tairgeoir atá toilteanach iarratas a chur isteach; agus (b) maidir le tásca geografacha faoi chosaint, tá saintréithe sa limistéar geografach sainithe atá éagsúil go suntasach leis na saintréithe atá i limistéir chomharsanachta nó tá saintréithe an táirge éagsúil leis na tairgí a tháirgtear i limistéir chomharsanachta. Iarradh ar an iarratasóir údair den sórt sin a sholáthar.
- (4) Sa fhreagra sholáthair an t-iarratasóir Doiciméad Aonair agus Sonraíocht tairge cothrom le dáta, inar sonraíodh gurb í an Chuideachta Comhstoic ‘Lidskoe Pivo’ an t-aon úinéir agus an t-aon oibreoir ar na toibreacha nach mór a úsáid chun ‘Лидский квас/Lidski kvas’ a tháirgeadh agus go ndéanann an t-iarratasóir an próiseas tairgthe ar fad i gcríoch chathair Lida agus de réir ‘treoir theicneolaíoch uathúil ar leith’, ar treoir í arb é an t-iarratasóir a húinéir agus an t-aon úsáideoir dá cuid.

(1) IO L 343, 14.12.2012, lch. 1.

- (5) Ar bhonn na faisnéise a soláthraíodh, tháinig an Coimisiún ar an gconclúid nach gcomhlíonann an t-iarratas na ceanglais a leagtar síos i Rialachán (AE) Uimh. 1151/2012 agus chuir sé in iúl don iarratasóir sa litir dhiúltaithe, mura mbeidh aon bharúil faighte laistigh de 2 mhí tar éis dó an litir a fháil, go bhfuil sé ar intinn aige tús a chur leis an nós imeachta maidir le cinneadh foirmiúil ón gCoimisiún a ghlacadh lena ndiúltaítear an t-iarratas de bhun Airteagal 52(1) de Rialachán (AE) Uimh. 1151/2012.
- (6) Chuir an Coimisiún san áireamh gur forbraíodh agus gur ceapadh córas na TGanna chun go mbeidh táirgeoirí in ann a dtáirgí a chosaint, i gcás gur táirgeoirí iad atá lonnaithe i limistéar áirithe agus a bhfuil a dtáirge éagsúil le haon táirge eile ar an margadh mar gheall ar an timpeallacht nádúrtha/shóisialta inar táirgeadh é.
- (7) Mheas an Coimisiún go dtugtar cearta comhchoiteanna le tásca geografacha faoi chosaint, murab ionann agus trádhmharcanna aonair, agus, i gcodarsnacht le trádhmharcanna atá faoi úinéireacht sealbhóirí atá inaitheanta go soiléir, meastar go bhfuil TGanna faoi úinéireacht comhphobail neamhshonraigh, lena gcuimsítear gach táirgeoir atá ann faoi láthair nó a d'fhéadfadh a bheith ann amach anseo a chloíonn leis an tsonraíocht ghaolmhar. Ciallaíonn sé sin go bhféadfaidh aon táirgeoir a urramaíonn ceanglais na sonraíochta táirge an t-ainmniú faoi chosaint a úsáid.
- (8) Tháinig an Coimisiún ar an gconclúid gur léir nach féidir le táirgeoirí eile a bheith rannpháirteach i gcás 'Лидский квас/Lidski kvas', toisc gurb é an t-iarratasóir an t-aon úinéir agus an t-aon oibreoir ar na toibreacha nach mór a úsáid chun an táirge atá i gceist a tháirgeadh.
- (9) Thairis sin, chuir an Coimisiún san áireamh gurb é an t-iarratasóir úinéir agus úsáideoir aonair na 'treorach theicneolaíoch uathúil ar leith', ar dá réir a tháirgtear an táirge. Dá bhrí sin, ní bhaineann saintréithe an táirge lena thionscnamh geografach faoi mar a cheanglaítear le hAirteagal 5(2) de Rialachán (AE) Uimh. 1151/2012 ach le 'modh táirgthe speisialta', mar a thugann an t-iarratasóir tuairisc air, atá i seilbh eisiach an iarratasóra. Tugtar tuairisc ghinearálta ar na teicnící táirgthe trí na céimeanna táirgthe amháin a liostú, gan aon mhionsonraí a sholáthar a fhágfadh go bhféadfaidh táirgeoirí féideartha eile a bheith rannpháirteach.
- (10) Ina theannta sin, foráiltear le hAirteagal 49(1) de Rialachán (AE) Uimh. 1151/2012 gur cheart iarratais ar TGanna faoi chosaint a bheith curtha isteach ag grúpa táirgeoirí, de ghnáth. Ní fhéadfaidh táirgeoir aonair iarratas a dhéanamh ar chosaint den sórt sin ach amháin má chomhlíontar coinníollacha breise Airteagal 49(1), an dara fómhír. Thug an Coimisiún dá aire nár thug an t-iarratasóir aon údar ina leith sin.
- (11) Níor thug an t-iarratasóir freagra ar an litir dhiúltaithe a sheol an Coimisiún laistigh den sprioc-am a leagadh síos.
- (12) I bhfianaise an mhéid thuas, measann an Coimisiún nach gcomhlíonann an t-iarratas ar chlárú 'Лидский квас/Lidski kvas' mar TGFC ceanglais Rialachán (AE) Uimh. 1151/2012, go sonrath Airteagal 5(2) agus Airteagal 49(1) den Rialachán sin.
- (13) Ba cheart, dá bhrí sin, diúltú don iarratas ar an ainm 'Лидский квас/Lidski kvas' a chosaint mar thásc geografach faoi chosaint.
- (14) Tá na bearta dá bhforáiltear sa Chinneadh seo i gcomhréir leis an tuairim ón gCoiste um Beartas Cáilíochta Táirgí Talmhaíochta,

TAR ÉIS AN CINNEADH SEO A GHLACADH:

Airteagal 1

Diúltaítear don iarratas ar chlárú an ainm 'Лидский квас/Lidski kvas'.

Airteagal 2

Dírítear an Cinneadh seo ar ionadaí dlíthiúil an iarratasóra:

EUROMARKPAT GERMANY
v.Füner Ebbinghaus Finck Hano

European Patent, Trademark and Design Attorneys
Mariahilfplatz 3
81541 München
An Gharmáin

Arna dhéanamh sa Bhruiséil, an 10 Lúnasa 2023.

Thar ceann an Choimisiúin
Janusz WOJCIECHOWSKI
Comhalta den Choimisiún
